



Pakistan-i kanga tali akhanger:
Afghan FM Amir Muttaqi

Ryan Williams India tebur football
team nung züngoksemogo

CM Rio-i Centre dang teyari meshir

Kohima, November 10, 2025 (TYO): Nagaland nung infrastructure, education, aser connectivity mapatongtem atema Centre sorkar teyari nüngdaker ta Chief Minister Neiphiu Rio-i ashi.

22 buba Annual Commonwealth Parliamentary Association (CPA) India Region Zone-III Conference nung tetushi tejaoker ka ama jembidang Rio-i Centre teyari nüngdakba onüktem lemsatep.

Nagaland nung Indian Institute of Science Education and Research (IISER) ka amenoktsü atema Centre-i bilemdangtsü ayongzüker. Union Budget 2015-16 nung iba ya sangdonga liasü saka mapa küma meinyaker, ajisüaka state sorkaribo Dimapur Airport anasa Sukhovi nung iba mapatong atema ali acre 200 yua lir ta CM Rio-i ashi.

Rio-isa Nagaland Institute of Medical Sciences and Research (NIMSR) ya AIIMS mesükba institute ka kümdaktsütsü atema ashi. Iba ajanga Nagaland aser temeket aliba state tem nung alirtem kanga ajangzüksü ta paisa shisem.

Nagaland nung railway line kilometer 8 dang lir anungji Centre-i Dimapur-Tizit railway line mapa tekaraba nung inyaksü ayongzüker. Iba ajanga Wokha, Mokokchung, Longleng, aser Mon district tem kilometer 250 süir ta CM Rio-i ashi.

Tawa tu Centre-i senotsü meperiba agi Kohima nung Ciethu Greenfield Airport mapatong atema senotsü

melemzüksü saka khi shisadangtsü mepishir ta paisa shisem.

Nagaland nung cobalt, nickel, natural gas, aser petroleum aika lir saka okadak oil exploration indang ken o benoka aliba atema item rongsen agiteta mamshiteter ta paisa metetdaksü.

Nagaland nung IIT mesüra National Law University amala national institutes mali aser item ya kanga nüngdaker ta Rio-isa ashi.

December 2024 nungi Nagaland, Manipur, aser Mizoram nung Protected Area Permit (PAP) tanaben benokshiba atema tebilemsü abener. Iba ajanga investment mesüteter aser rongsenketzüng renloksü maongkatem alenbanger ta paisa ashi.

"Nagaland nung infrastructure, connectivity, education, aser institutional development atema special consideration nüngdaker" ta Rio-isa nenshi.

North Eastern Regional Commonwealth Parliamentary Association (NERCPA) ya asür P. A. Sangma lenisüba kübok 1996 nung tenzüker aser iba nüngja 2018 nung CPA India Region Zone-III ta melen. Nagaland-i regional parliamentary collaboration nung tongtipang shilem agia aruogo aser 1977 nung mezüngbuba NERCPA Conference ayonga amung aser iba sülen 2007 nung 10 buba mungdang amung, ta Chief Minister Rio-isa ashi.

Nagaland nung tanü 'Remembrance Day' amunger

Dimapur, November 10, 2025 (TYO): Nagaland sorkari British Deputy High Commission Kolkata den külemi November 11, 2025 nü 'Remembrance Day' ayongzüka amungtsü.

Mongulbarnep 11:00 ako nung Kohima War Cemetery Commonwealth War Graves Commission nung iba sentong agitsü. Sentong nung Chief Minister Dr. Neiphiu Rio-i tetushi süa jaoker aser Deputy Head of Mission, British Deputy High Commission Kolkata Bhaarat Dave-i alaketa jaoker ama shilem agitsü.

Iba sentong nung Home Commissioner & Principal Secretary Abhijit Sinha menden asütsü.

Sentong agiba sülen lunch mapang alitsü aser Nagaland

Territorial Army ajanga band performance alitsü. Iba sülen Vintage Car Rally ka tenzüksü.

First World War nung taküm bendanga agütsüba armed forces nem tetushi agüja Commonwealth member states ajanga Remembrance Day amungtsü tenzüker. Iba anogo ya non-Commonwealth linüktem nunga war remembrances sentongtem ayonga agir. Linük teimba ka nung Remembrance Day ya November 11 nü amunger aser iba ya First World War anenba bilemteta amunger.

"1918 nung ita 11 buba nung anogo 11 nü ghonda 11 buba nung rara anen" ta Germany aser Entente nungi teshimtet nübotemi anepdang 5:12 ako aser 5:20 ako meta sign asüba armistice nung shia lir.

Om Birla-i NE legislatures ajanga temelenshi bener arutsü ayongzüker



Lok Sabha Speaker Om Birla-i NLA, Kohima nung 22 buba Annual CPA India Region Zone-III Conference nung jembidang agiba noksa ka angur. (Kohima, November 10, 2025)

Kohima, November 10, 2025 (TYO): Lok Sabha Speaker Om Birla-i Hombarnü 22 buba annual Commonwealth Parliamentary Association (CPA) India Region Zone III lapoktsüogo.

"North Eastern State tem nung legislative bodies ya temelenshi bener arurtem asütsüla. Legislatures ajanga policy tem yanglushir aser sorkar ketdangsubaren tajung adokdaksür" ta Om Birla-i ashi.

Iba sentong nung NE state tem nungi Speakers, Deputy Speakers, Presiding Officers aser MLA tem aden.

"Northeast nung Legislative Assemblies-i regional development aser industrial growth ajungkettsü atema policy tem yanglua inyaksüla. Nenoki lemtet agibatam ajanga lisopurtem nem tashi agütsütsüla aser lisopur art, culture, aser traditional crafts ya linük aser alima jenjang nung sayutsüla" ta pai ashi.

"North Eastern State tem nung democratic tangatetba nung

tera ayangba, longjemer lemtetem agiba aser technology sülen anidakba atema tenüsang agütsür. Northeast nung Assembly teimbaka paperless kümogo aser iba ya mapa tajung ka lir" ta Birla-isa ashi.

"Külemi olemtepba aser public-i shilem agiba ajanga asen legislatures-i ajak ajangzüksüsa policy tem yanglutsü akok. Anogo ananü mungdang ajanga legislative rejutem tali tashi itshitsü amanger" ta paisa metetdaksü.

Lok Sabha Speaker-isa Nagaland nung alir ajak dangi Hornbill Festival salem aben. Iba benjung ajanga Nagaland nung sobaliba akaba aser telongjem tamaisü sayur ta paisa ashi.

Nagaland nung Commonwealth Parliamentary Association (CPA) India Region Zone III conference tasembenbuba ayonga amungba atema NLA complex nung nüngshilung ka Om Birla-i sayatsü. Mezüng 1997 nung aser

tanabuba 2007 küm munga liasü.

Iba mungdang ya "Policy, Progress & People: Legislatures as Catalysts of Change" omen nung ajemdaker amunger.

Iba mungdang nungsa "Role of Legislatures in Achieving Viksit Bharat" aser "Climate Change - In the Light of Recent Cloudbursts and Landslides in Parts of the Northeast Region" omentem nung ajemdaker plenary sessions agitsü.

Ano, mungdang nung shilem ka ama Tree Plantation Drive ka agitsü aser iba ya benjung amungba tenüng nung aser environmental awareness ajungkettsü atema lir.

Kütem süia arudang CPA India Region Zone-III ajanga regional cooperation tali tajungba kümdakja arur. Iba mungdang ajanga parliamentary best practices ajungketer aser infrastructure development o Act East Policy amala northeast dak sendakba tebilemsütem benoka lemsateper.

Delhi nung nisung 13 pokset; 24 yiru



New Delhi, November 10, 2025 (Agencies): Hombarnü Delhi nung Red Fort anasa gari ka nung bomb tesashi ka apokdang nisung 13 asü aser 24 yirua lir.

Taonung 6.52 ako nung Red Fort Metro Station anasa Hyundai I20 gari ka nung bomb tesashi apok.

"Red Fort traffic signal ka nung gari ya tanemi oa anendang bomb ji apok. Gari nungji nisungtem mena liasü aser bomb apokba ajanga anasa aliba garitem raksatsü" ta Delhi Police Commissioner Satish Golcha-i ashi. Iba bomb apokba ajanga gari 22 raksatsüba osang

angazüker.

National Investigation Agency (NIA) aser National Security Guard ajanga bushisüngdang nung shilem agitsü tenzüko.

Iba tatalokba sülen Mumbai, Jaipur, Haryana, Uttar Pradesh, Uttarakhand aser Bihar nung high alert osang sangoktsüogo. Kerala sorkaria police dang security akangshitsü tetuyuba agütsüogo.

"Onoki osang angazükli mapa inyaker aser unit tenet tashi lendong atalokdaki yok. Taonung 7:29 ako meta miji azüoktetogo" ta Deputy Chief Fire Officer AK Malik-i ashi.

Hombarnü Delhi nungi kilometer 50 shi dang pilar explosives seret 2,900 tashi apuba anogo nung iba lendong atalokogo. Tanü Haryana kübok Faridabad nung explosives aika apu.

Union Home Minister Amit Shah-i Prime Minister Narendra Modi dang iba lendong indang osang lemsatepogo. Delhi Police Commissioner aser NIA o Intelligence Bureau (IB) tekolaktemi Home Minister nem mapang shia osangtem sangoktsüdar.

"Iba tatalokba ya jungjunga bushisüngdang asütsü" ta Amit Shah-i metetdaksüogo.

Kohima nung Janjatiya Gaurav Varsh Pakhwada 2025 ayongzük



Hombarnü NSF Solidarity Park, Kohima nung Janjatiya Gaurav Varsh Pakhwada 2025 amungdang tangokba noksa ka nung MLA Imtichoba den Tribal Affairs ketdangsürtem angur.

Dimapur, Yimpoksüi/Nov. 10 (TYO): Ministry of Tribal Affairs, Government of India ajanga senotsü teyari agüja Tribal Research Institute (TRI), Nagaland, Department of Tribal Affairs ajanga November 10, 2025 nü NSF Solidarity Park, Kohima nung Janjatiya Gaurav Varsh Pakhwada 2025 ayongzük,

kong tetushi tesemdanger ka ama Imtichoba, MLA, Government of Nagaland aden.

Iba sentong nung Tribal Tug-of-War Competition ayongzüka state tesem balala nungi kin 14-i shilem agi aser Angami kin-i takok angu.

Iba sentong nung Voluntary Blood Donors

Association Camp ka liasü, koba medical team teyari nung agi aser Exhibition of Tribal Art & Crafts liasü.

Linük puti otsü aser terenlok atema tribal nisungtemi shilem tajung agiba tushia India linük tesem ajunga nung Janjatiya Gaurav Varsh Pakhwada ya ayongzüka agir.

State tesem ajunga nung lokti nübuttsük alitsü

Dimapur, Yimpoksüi/Oct. 10 (TYO): Benjong-bentsü tonga aruba ajanga renemshia State nung nüburtemi amshiba tesemtem mürekmejua aser tebour jungdaksütsü nükjidong nung November 12, 2025 nü lokti nübuttsük alitsü Home Department-i telemtetba agiogo, ta sangdong ka nung ashi.

Iba lokti nübuttsük ya State tesem ajunga nung alitsü, kong sorkar sorkar mapa inyaker aser nüburtemi shilem agitsü.

Iba lokti nübuttsük takok ngua ayongzüktsü atema Government Departments/Offices ajunga aser Urban Local Bodies (ULBs) nungi shilem agitsü atema Deputy Commissioners temi tapet mera agitsüla. Civil Society Organizations aser Village Councils den teka amteper nübur timbai shilem agitsü asoshi DCs temi mera agitsüla.

Iba lokti nübuttsük mapang lenmang nung kisü-jensüba

osettsüet yua aliba ajunga agientsüla, lenmang tezülen indokba latrines aser ak ki agientsüla/raksatsüla ta ashi.

Jila nung aliba dokan tem nung aonung tesangwa shidak inoka signboards tem ayutsüla. Raksar aliba signages tem yanglushitsüla aser dokan aser business establishments tem sentsü tepshitsü ajungshitsüla.

Highways (National aser State) nung aliba yimtsüngtemi lenmang temeket arem müreksüla. Iba atema NHIDCL/Works & Housing/Rural Development Departments ajanga teka amteper inyaksüla aser mera agitsüla.

Dimapur -Kohima Highway nung aliba divider tem yimtsüng ketdangsürtemi anepalua müreksüla.

Aonsotsü ayokba stalls, marketing sheds amala mesüktepa yanglutsü atema district administration aser Agri-

allied departments tem külemi inyaksü.

Urban Development Department ajanga Urban Local Bodies (ULBs) ajunga den teka amteper lenmang tem nung metzü meshiba tesem shidak yanglua ayutsüla, shi ayokba tesemtem mürekmejua amshidaktsütsüla aser plastic jana müreksü asoshi special drive agitsüla, ta ashi.

Iba lokti nübuttsük nung shilem agitsü atema Departments of School Education, Higher Education aser Technical Education ajanga totuyuba balala agütsütsüla.

Item totuyuba shidak inyakdaksütsü atema DCs temi special teams tenteta tesem balala semdangdaksütsüla aser shilem magirtem asoshi tapet mera agitsü aser shilem agir asoshi DPDBs nung tenüngsang agütsütsü, ta sangdong ajangasa ashi

Territorial Army Recruitment Rally atema renemshir

Dimapur, Yimpoksüi/Nov. 10 (TYO): Dimapur District Administration, Police, Traffic, PHED, Medical aser 113 Infantry Battalion (Territorial Army) Rajput nungi Commanding Officer-i anir ketdangsür temi anogo 14 Territorial Army Recruitment Rally atema renemshia November 10, 2025 nü Bhagat Stadium, Rangapahar nung 'comprehensive on-ground recce' ayongzüka liasü.

Iba recruitment rally ya November 15 nungi November 29, 2025 tashi alitsü.

Iba survey sentong nung TCP Gate nungi rally agitsüba tesem tashi lenmang, lokti azüoktsü, traffic azüoktsü, safety barriers, directional signage nungdakba tesem nung inoktsü indang reprangshima liasü.

Documentation, batch formation aser assessment

zones telungi lireptsüka odaktsütsü asoshi candidate tem anidenba tesemtem repranga liasü.

Main rally site nung palnoki Physical Fitness Test (PFT) lanes, Physical Measurement and Medical screening areas, communication setups, water points, metzü meshia tesem aser jana ketdangsüba semdanga liasü.

Iba rally tenzüktsü anasa metokmeperi jangjatettsü nükjidong nung parnoki item tesem ya semdanga jaja.

North Eastern States ter aser West Bengal nungi rally nung shilem agirtem anepalutsü aser iba rally takok ngua ayongzüktsü atema 113 Infantry Battalion (TA) Rajput kanga junga renema lir.

Rally agitsüba tesem tonga anepdang 4:30 ako nung arutsüla aser Phase I (15-19 November) ya Nagaland,

Andaman & Nicobar Islands, Manipur, Mizoram, Tripura atema alitsü.

Phase II (20-26 November) ya Assam (BTR, Central, North, Lower, Barak Valley), Meghalaya, Arunachal Pradesh atema aser Phase III (27-29 November) ya West Bengal (18 districts), Sikkim atema asütsü.

Recruitment ya Soldier (GD), Clerk, aser Tradesmen categories atema aser arishi küm 18-42 tsüngta atema asütsü.

Tar 160 cm bo asütsüla (regional relaxations alitsü) aser temang tuozük seret 50 tema asütsüla.

Physical Fitness Test (PFT) nung minute 5 sür seconds 45 nung metre 1600 asemtettsüla, pull-ups 6 ben, 9 ft ditch, zig-zag balance amala alitsü.

Medical Examination ta PFT sülen qualify asürtem asoshi agitsü.

Niuland district nung Padayatra ayongzüktsü

Dimapur, Yimpoksüi/Nov. 10 (TYO): Government of India-i MY Bharat Department (Ministry of Youth Affairs and Sports) kübok District Administration, Niuland den teka amteper Sardar Vallabhbhai Patel sor küm 150 ajungba nüngtem nung November 13, 2025 nü Padayatra ayongzüktsü ta sangdongogo.

Iba rally ya anepdang 6:00 ako nung Clock Tower nung tenzüktsü aser Town Hall nung tembangtsü.

Iron Man of India nüngja agüja alisang, Sardar Vallabhbhai Patel nem akhum agüja Padayatra ya ayongzüker, shibai linük lungjemdaksüba nung tongti shilem agia lir. Iba sentong ya ajanga linük telungtem aser nüburtem angatettep aliba tanüla adokdaksütsü nükjidong lir.

Sardar Vallabhbhai Patel ya India indang Home Minister aser Deputy Prime Minister mezüngbuba liasü aser internal security, law and order aser princely states 560 dak tema aliba Indian Union küboki aitdakja lungjemdaksütsü mapa nungloksü.

Patel sor küm 150 ajungba nüngtem nung Niuland district kübok November 11, 2025 nü mürekmejuba sentong agitsü, November 12, 2025 nü Sardar Vallabhbhai Patel takum aser pa mapa indang Essay aser Elocution Competitions alitsü, aser November 13, 2025 anepdang 6:00 ako nungi tenzüka Padayatra ya ayongzüktsü.

Iba Padayatra nung sorkar ketdangsür, NCC cadets, NSS volunteers, lanur club balala züngsemtem aser nüburtem arua shilem agitsü pelashishia jaoker, ta sangdong ajanga ashi.

“Süngdongzüng Nung” ta asüba kakat Wb. Jonglemdong Longkumer-i züluba sayaogo



Wb.Jonglemdong Longkumer-i(achichi) züluba “Süngdongzüng Nung” ta asüba kakat tanü Ao Riju Conference Hall nung Ao Riju Chairman Rev.Prof.Rongsen Lkr-i(tiyong) sayatsür kelen Wb.I.Temjen Tzüdir(abelen) dena tangokba noksa.

Mokokchung Yimpoksüi/November 10(TYO) : “Süngdongzüng Nung” ta asüba kakat Wb.Jonglemdong Longkumer-i züluba tanü Ao Riju Conference Hall nung Ao Riju Chairman Rev.Prof.Rongsen Lkr-i sayatsüogo.

Iba kakat ya nisung dak aketba shisatsü merajemi aliba aser nisung jakla balala indang zülua meimchiri angazüktsü aser ibaji ajanga taküm melenshidaksütsü nükjidong nung zülua lir ta kakat zülur-i ashi.

Kakat zülurisa iba kakat ya azüngba ajanga nüburtemi asen Ao oshi angazüktsü aser Ao oshi renlokba nung yaritettsü

tamang akar ta metetdaksü. Tanu iba kakat ya Kumlong Baptist Arogo Pastor Wb.K.Meren-i meshiteta sarasademsü aser iba sentong Ao Riju Publication incharge Wb.I.Temjen Tzüdir ketdangsüba nung agi.

Kakat zülur Wb.Jonglemdong Longkumer ya Ungma nunger Education Department nung Jount Director nung retire asü aser pai tamalen züluba kakat “Pentongteper Sangro” nungi agiteta sangro karbo Ao kakat BA nung züngdagi. Tang zülua adokba kakat “Süngdongzüng Nung” kakat ya senpak 250 lir aser taginertemi Ao Riju office nung angutsü.

Mokokchung district nung lokti nübudok ayonger

Dimapur, Yimpoksüi/Nov. 10 (TYO): Mokokchung district ajunga nung November 12, 2025 anepdang 7:00 ako nungi tenzüka lokti nübudok alitsü, ta Deputy Commissioner, Mokokchung, Ajit Kumar Verma, IAS ajanga sangdong ka nung matetdaksü.

Anungji Mokokchung district kübok Offices/Schools/

Institutions/ULBs/yimtsüng ajunga dang Home Department, Government of Nagaland nungi totuyuba aruba ama iba sentong ayongzüka agitsü metetdaksür, ta ashi.

Sorkar nem agütsütsü atema iba Office nem Action Taken Report (ATR) den geo-tagged noksa tem agütsütsü la, ta sangdong ajangasa ashi.

Red Fort anasa langka apokba lendong nung nisung 8 asü



New Delhi, November 10, 2025: Hombar aonung 7:00 ako meta Delhi nung Red Fort anasa lendong atalokba tesem noksa nung angur.

New Delhi, November 10 (Agencies): Hombar aonung New Delhi nung Red Fort anasa anena aliba gari ka nung langka sashia apokba sülen anasa aliba gari aika arong; iba lendong nung nisung 8 asü aser aika yiruogo, ta police-i metetdaksü. Delhi Fire Service nungi tongti ketdangser kati, "Red Fort Metro Station gate number One anasa anena aliba gari ka nung langka kanga sashia apok. Iba lendong nungji nisung aika

yiruogo," ta metetdaksü. Anti-terror squad aser Delhi Police Special Cell iba tesemji tonga aoba sülen bushisüngdang tenzüokogo. Tenük kuli alir kati, "Ni gurdwara (tekülem ki) nung lia ni ola tuluka angashi. Onoki ibaji kechiar memeteti liasü. Anasa aliba garia aika raksatsüogo," ta metetdaksü. Ano tenük kuli alir kati, "Langka sashia apokba ajanga anasa aliba dokan aser kiojen-a

anokshija liasü. Iba lendong nung nisung aika yirua anir ogo," ta metetdaksü. Aonung 7:00 ako atongtsü anasa Delhi Fire Department nem iba osang metetdaksüba sülen fire tenders tenet aser CAT ambulance 15 iba tesem jagi ao. Iba lendong nung nisung 8 asüba jangjaogo aser yirua alir nisung 30 jungnüa hospital-i anir ogo, ta ketdangsertemi metetdaksü.

Kashmiri nunger doctor ka ket nung tapoktsü oset seret 360 apu

New Delhi, November 10 (Agencies): Hombarnü Faridabad nung Kashmiri nunger doctor ka ket nung tapoktsü oset seret 360 den raraba hadir kar puogo. Haryana Police-i apusangji arrshi küm 35, Sadiq Jamal lir. Pa ya Jammu & Kashmir kübok Pulwama nungi lir. Faridabad nung State Special Task Force (STF)-i pa apu. Intelligence osang nung ajemdaker STF team jagi par ki mita aoba mapang nung high-grade explosives (RDX) seret

360, electronic detonator 50 aser pistol 10 den injang, digital timers, circuits aser wire apu. Haryana DGP, Shatrueet Kapur-i, "Item hadir ya Delhi-NCR region nung kiralongradang amshitsü atema liasü," ta metetdaksü. Jamal ya Kashmir nung doctor inyaka liasü aser pai Pakistan nungertem atema inyaker. National Investigation Agency (NIA) aser Anti-Terrorism Squad (ATS) nati iba ken o bushisüngdangtsü agizüka Explosives Act, Arms Act aser

UAPA kübok ken o benokogo. Osang angazükba agi, Jamal-i Lashkar-e-Taiba (LeT) den tongtepratepa inyaker. Jamal den külemi inyaksemer anabo jenshia senzüdar aser parnok aputsü atema Kashmir aser Delhi na nung mita odar. Taoba ita Haryana kübok Karnal nunga RDX seret 50 pua liasü. Tang benjung mongpu nung Delhi-NCR nung security kanga akhangshiogo aser police danga yakyaka alitsü metetdaksüogo.

Dalit Khristan/Muslim SC atema tentetba luden nem ita 6 agütsür

New Delhi, November 10 (Agencies): Dalit Muslim nungertem aser Dalit Khristanem nem Scheduled Caste (SC) jenjang agütsüta atema asadangtsü asoshi tenteta aliba commission nem ano mapang agütsüsema ita 6 atsülangtsüogo. Taoba hopta Ministry of Social Justice & Empowerment-i taoba mapang Chief Justice of India, K.G. Balakrishnan leniba nung akümba züngsem asem commission nem ano ita trok mapang atsülangtsüogo. Iba commission ya küm ana atema 2022 küm October ita nung tenteta liasü, saka küm ana tsüngda commission-i report magütsüetba agi yaküm sorkari ano commission nem küm ka mapang atsülangja liasü. Iba sülen-a commission-i report magütsüetba agi tang ano ita trok mapang agütsüsemer. Muslim nunger temeden atema inyaker, Gurindar Azad-i, commission nem maneni mapang atsülangtsüba ajanga sorkari iba onük ya süoki ia magiba sayur, ta metetdaksü.

Paisa, "Dalit nunger Khristanem aser Dalit Muslim nungertem nem SC jenjang agütsüta tetemsü. Külem yimsü amangertemia parnok bendangshidanga amshir. Parnok rongsenkettsüng tsütsüa kanga sendaker. Iba commission tentetba atema pelar, ajisüaka maneni commission nem mapang apuloktsüba ajanga sorkari iba onük süoki ia magiba sayur," ta ashi. Azad-isa sorkar dang Dalit Khristan aser Dalit Muslim nütüngtem nem SC quota ji shilem 15 tujang, ta takhangba agütsü. Linük temzüng kübok Hindu aser Sikh nungertem nem SC jenjang agütsür, aser 1991 küm Buddhist nunger nem-a SC jenjang agütsü, ajisüaka tanü tashi Dalit Khristan aser Dalit Muslim nungertem nem SC jenjang magütsür. Iba tebilemtsü onük shisadangtsü atema 2008 küm National Commission for Minorities-i committee ka tentetja liasü aser iba committee jagibo Dalit Khristan aser Dalit Muslim nungertem nem SC jenjang agüjang ta benoka liasü.

Tanü Bihar nung assembly election tanabuba shilem agitsü



November 11, 2025 nü Bihar nung assembly election tanabuba shilem agitsü lia Hombarnü Jehanabad nung polling ketdangsertemi EVM densema election dak sendakba oset balala bener polling station-i apusoa aodang tangokba noksa nung angur.

Patna, Yimpoksüi/November 10 (Agencies): Bihar nung assembly elections tanabuba shilem Mongolbarnep 7:00 ako nungi tenzüka agitsü; iba election nung menden 122 atema candidate ajak senteper parnok 1,302 lir. Candidates 1,302 nungji tebur 1,165 aser tetsür candidate 136 lir aser candidate ka third gender category nungi lir. Menden aika nung JDU aser BJP nati aniba NDA aser RJD o Congress nati aniba Mahagathbandhan teloktep na tsüngda atongtepa tokteptsü, ajisüaka menden kar nungbo AIMIM aser Jan Suraj Party na jenjang junga lir. Assembly constituencies 122 nungjagi 101 bo General seats lir, menden 19 Scheduled Castes indang lir aser menden ana Scheduled Tribes atema lir. Election Commission of India (ECI)-i, election tiptema tajungtiba nung agitetsüsa maparen ajak renemogo, ta metetdaksü. Election tanabuba shilem nung voters ajak senteper 3,70,13,556 lir aser iba nungji

tang mezüng vote agütsütsüpür 10,21,812 densema lir. Voters 1,95,56,899 teburtem lir, tetsür voters 1,70,68,572 lir aser third gender voters 943 lir. Voters 7,69,356 bo arrshi küm 18-19 tsüngdapurtem lir aser tang mezüng parnoki assembly election nung vote agütsütsü. Election tanabuba shilem atema Election Commission-i polling station 45,399 amenokogo aser polling station 595 bo tetsürtem kijai ketdangtsütsü. Polling station 91 bo Persons with disabilities (PwD)-i ketdangtsütsü aser model polling stations 316 alitsü. Polling station 45,399 nungbo web-casting facilities alitsü. Election tanabuba shilemji district 20 nung agitsü aser item districts ji - West Champaran, East Champaran, Supaul, Sheohar, Sitamarhi, Madhubani, Araria, Purnea, Kishanganj, Katihar, Banka, Bhagalpur, Nawada, Jamui, Aurangabad, Gaya, Rohtas, Kaimur, Jehanabad aser Arwal lir. Bihar nung assembly election mezüngbuba shilem November 6 nü agia liasü.



"My Handloom My Pride"

NAGALAND HANDLOOM & HANDICRAFTS DEVELOPMENT CORPORATION LTD.

(A Govt. of Nagaland Undertaking)

Dimapur : Nagaland



Cordially invites you to the

STATE HANDLOOM EXPO (SHE)

HATHKARGHA MELA

UNDER ATMANIRBHAR BHARAT UTSAV

11th - 24th November 2025

To be inaugurated by :

Shri. Prasielie Pienyü

Chairman

Nagaland Handloom and Handicrafts Development Corporation Ltd.

(A Govt. of Nagaland Undertaking)

At Urban Haat, Dimapur, Nagaland

Sponsored by :

Office of the Development Commissioner (Handlooms), Ministry of Textiles, Govt. of India, New Delhi

R.S.V.P

M. 9436001271

M:9612338901

Er. Y. Lipongse Thongtsar

Managing Director



TIR YIMYIM YIMOBILEM (EDITRIAL)

DIMAPUR TUESDAY, NOVEMBER (YIMPOKSÜI) 11, 2025

Yiartemelection-i aiba putu!

Tanü tensa Nagaland nung assembly election-i aiertemibo manganütsüa akok saka teidangertemi dang Nagaland nung agiba election indang aser nübortem mulungjang meteta lir, anungji Nagaland Legislative Assembly nung amentsü asoshi election nung toktepba ya yiartem peisasa pei yirutsüa raratepba mapa-ang ka mesüka lir. Ano, tia majung kaji, assembly election dang masü saka küm ishika magii arur tawa agiba Municipal aser Town Council election nung toktepertema nüchibo masü ama takaba ajak toktoka election nung toktepba osang angashiogo. Asen lima election mapang MLA akümtsübaji chuba mendeni atutsü amai nübortemi jembir aser tairtemia karibo bilema alitsü akok, anungji chuba mendeni sen agi alitsü atema sen crore ter-metsü endoka election-i aier. Atangji, constituency kar nungbo vote alidang sen iba dang nungi teimba endokba osanga angashiogo. Ajisüaka, MLA menden ya chuba menden masü saka nübortem tenzüksü atema kilir amenba menden aser nübortem tipdema yimji-yimjung nung lidaktsütsü asoshi ozüng yanglurtem amenba menden ta asenoki angatetsüla. Ashiko, tanü election nung sen endokba ya chuba menden aser chuba korang alitsü atema jenjang agütsür ama bilema, mapayui aser mebilemdangi senotsü endoka alitsüa akok. Ajisüaka, MLA akümba ya chuba akümer amai election-i aiertemi bilemra, ano ajisa teyiraba aser matuba asütsü aser nübortemia election ya parnok madak chuba shimtsü asoshi agir amai bilemra, nübortemji nüchi masü saka yiar aser alar kolok adenba purtem asütsü. Iba ama yiar kolok atenertemi MLA menden ya chuba menden aser aser chuba korang alir ama bilema sen crore aika endoka election-i aier aser nübortemia par chuba shimer asünungji, chuba kümerbo anasaia moutettsü ta bilema election mapang pei vote pei tenüng nung khen, pei kibong tenüng nung khen aser ano pei telok tenüng nung khen ta pei vote agi küm kabo chiyong shia yokzükteter. Iba jagi election temer, mezüng kümbo nübortem ajak sentsü ititer pelapalar senzüa gari nung dang senzüa ajurutsü saka tanabuba küm nungiang gari nung toztü meinoktet, bus bara mali, tanurtem nungdak meperitsütet, temang majung saka mozü ki tongtettsüla masü, kidang senjang kata maka ta timtem marem karbo balalulatsüsa akümer. Ano, külen election-i aiertem rongnung matokertem dang nungibo ano tadokertemang timtatemba, pei itasen agi gari nung toztüang meinokshi, terenlok mapa atema lemsükba sen ajak agizüka agiyonga election sentsü matu, sentsü aotsü asü, terenlok mapa inyaksü? Ano külen election mapang vote ayokertem to agisa pei nübo aser rongsen agi bendanga agüja yari ama, MLA-ba dang sen-a meshir aser mapaa meshir aser temeimsüka, MLA-ba ket nung sen-a mali aser mapaa mali, khenkhenbo yiar amaia jembir. Atangji, Nagaland nung MLA akümtsü asoshi sen lakh ter endoktsüa malang, saka asenoki crore ter-metsü endoker! Aji kong nungi bener arua sentsü aotsü? Aji oda, asenok yimkong nung senso ajak adenshir senso mungdang lia election nung shilem agitsü lemtetbato, bilemdangra, senso mungdang masü saka Alar Mungdang alirba liasü ta asenoki angatetsü. Aji oda, asenok senso mungdang aser asenoki agiba election yabo alar adenshir parnok madak kibur kümdaktsütsü asoshi parnok rongnung ka shimteter parnok ajak pa dangji ayokba otsü lir. Alari pei temeten ayok nung kodaser nüchi akümtsü? Atangji, election agiba ya nüchi purtemi parnok asoshi tsüzüng ozüng lateta yimsü asütsü asoshi yimsüsür shimba mapa aser sentong lir. Aji oda, yimsüsür kaji alar-a masütsüla aser yiar-a masütsüla, sensaker-a masütsüla aser ochimashir-a masütsüla. Yimsüsürji alii alutetba aser nübortem den külemi litetba aser nübortem tebilemtsü aser nungdak reprangteta jembitsütetba aser inyaksütetba nisung asütsü tim. Ibajibo sen agibo malitetsü aser tayoka meyoktettsü. Ibajibo jenjang ataktsü makok, pi temesüng nung oshi nung Pricelss!

OLEMSABANG

ABAMI TEINTETROGO TA AJABA NÜNGJA

~ P.Renthy Jamir

Tang October 3 nü 2025 asen Aor temeteter kati kü dang yamai ashi, odi senior Citizen sentep nung kü nem O jembitsü agüja lir, saka Senior Citizen ta asüba ya Teintet rogo ta sür enokja lir. Aser onok yimeribo Senior Citizen dang Teintet rogo ta majar nai-a koda ashir ta asüngdang. Anungji ni asenok kasa onok yimeria Senior Citizen dang Teintet rogo ta ajababo ni kodanga mangashi, nai jungjunga apidanger jembitsüla ta shir toktsü. Kechiyong tang tashibo iba ya Ao o osep nunga zülua mali.

International Day of Older persons anogo ya Ao Arogotem nung joko küm 20 munga arur asünung ajaki kanga junga meteta lir. Saka dang yabo motongshia melenshitsüla ta zülur asünung tentsügi khen lua O-Shilu tetenzük nungi zülur.

TEMZÜNG- The maintenance of welfare of parents and Senior Citizen Act, ya UN nung mezüngbuba 1948 nung khen jembir ano 1969 nunga jembir, tesüa 1982 nungang tantsür tamburtem asoshi tapet teinyaktsü maparen bendener 1991 October ka nungi tenzuka amungtsü lemtet. Aser ABAM-i Ao arogotem nung iba anogo amungtsü 2006 nung temelaba agütsü. India nung iba temzüng ya mapa kuma inyaksü India Presidenti 29-12-2007 nung meyongnem asü. India nung alir atema dang masü India nung, alima balala nung prokshia alir Jammu and Kashmir dak alema iba temzüng inyaksim bentshitsü. Nagaland state nunga Governori 12-04-2008 nung sign asü.

Alima rangben nung Senior Citizen ajangzüksü mapatong itemi lir.

- 1) Parnok taküm kümzüka ayutsü.
- 2) Parnok meyong Senotsü rongsen kümzüka yutsütsü.
- 3) Parnok temesür malirtem atema old-age homes Governmenti sütsütsü.
- 4) Mozü agiba nung tesadang kabo government-i menoktsütsü.
- 5) Parnok atema separete queues line balaka yangluja noktaksü.
- 6) Teyari pension sen agütsütsü.

India nung District ajak nung old-age homes yanglutsü ozüng lir, Nagaland nunga District 10 nungbo iba ki yangluja lir. Senior Citizen ta ajaba ya küm 60 nungi 79 tashi ano Super Senior Citizen ya 80 tema dang ajar. Ano kasa nungja telemsa nung arishi küm 60 nungi 74, Elderly ta ano 75 nungi 84 old age aser küm 85 tema old old ta ajar. Ao oshi nung nisung ka aso (küm 100) telemsa yamai ajar, yangi tongtibang temetetsü kaji nisung shia tantsür tambur akümba (Asa apongba) aser tsüla ola melenshiba balala lir. Karbo asa apong mazü yakta tantsür tambur akümer ajebzüka asar ola-a balaka akümer. Karbo tesü tonga sentsü ita küm küm küm alir. Saka Aori yimkongren (General) nung nisung ka sozükli nungi lepi mai tashi nung nungja telemsa tarensen yamai ja-a aru aser maneni ajar.

- 1) Kinü - Tanur ka Sozükli nungi menteta apua mao tashi kinü ajar.
- 2) Mentetapuzür - Kodang tera nisung mesüka menteta apua odir Mentetapuzür ta ajar.
- 3) Jajazür - Joko tera tain kuma noktakteta jajazüa senzür dang jajazür ta ajar.
- 4) Yimdong Kazür - Parnok ya tarepden-dang joko Yimdong nung kima oa asayatepa kazür dang Yimdong kazür ta ajar.
- 5) Aiür Asangur - Tebenjem mapang joko yim maparen nunga Parnok shilem agia inyaker ano kiba kiyia maor dang Aiür Asangur mapang ta ajar.
- 6) Kijung lanu - Kibong kümer kijungtsür kijungpur lanur lanutsür. Parnok dang kijunglanu ta ajar. Chibangnubang mapang.
- 7) Atura - Tashika mapang yimsüsü tajungdang alu ayim nunga tsük teimba aror Nashi sü achir arüshi-i ao nunga parnok ya süsü sür aotsü Parnok mapang ya mapa ajak nung takotet pei chirnurtema nübu ajunger jangratemtsü mapang Atura ta ajar.
- 8) Pokma - Putibang joko tashi tanir yimten yimli yimsüsüba maparen ajak nungi anener (pensioners) joko shi temang tasar Parnok tzütemung memungdaktsür khu bena maor yim saru tesadang tang meshir. Senior Citizen.
- 9) Pojen- Kanga tantsür tambur tasareper asa-a taor super Senior Citizen Pojen tetezü chipo teintoktsü ayuba alemli ali chipo dang amshi aser iba tejenji tagidak maka Parnok yim sabisaru kecha maka taküm alibaji tangar teyari meteni alitsü makok. Akümlir ogo ta asüri maru-a ta alir.

Anungji kinunger malirtem atema governmenti old age homes yanglutsür yangji mesür.

Tang taginüba onük dangi arudi- adianu Aor temeteter ka o jembitsü ratabaji Senior Citizen ta ajabaji Pokma aser Pojen dang ajar. Saka ABAM-i Teintetrogo ta amshir. Asenok ya Davidi ashiba ama arishi küm 70 nungi 80 tashi nung aika asür ano arishir rogo 80 nungi 90 tashi nung arishi atemer. Aser kanga langa alir rogo küm 90 tema nung asüyim bushir.

Ao oshi nung kodang TEINTET ta südir iba tetezü tera balala ana nung amshir. Mezüngbubaji tila tanur ka kümli tajung majeber tezü matsür iba dang tanur Teintet ta ajar. Tanabuba Teintet tetezü yabo Süngdonglidong shiruru aser nisung ajak (common) nung amshia jembir. Alu pentsü toktsüba to joko arem jungjunga intetogo. Rubber atemba to jungjunga inteta lir. Arem teintet, rubber teintet. Alu nung pongzü teintet ka adoker pongzü tayi teintet Sangtemlar Nashi pongchi teintet ka liasü. Tetezü tashi tait tekümküm dang teintet ta ajar. Nisung atema bo teintet ya tamajungren nung teimba amshir. Asen zünger lanuba ya tera tali intet. Pa Teintet mazü pa ajungba apir. Ano Ao oshi nung o tamajungtiba kaji tamaintet ta jembiba ya lir. Aser yangi senior Citizen ta asüba ya Pokma aser Pojen ana ya meyokteper ajaba lir. Tantsür tambur tasar rogo pension ngur joko mapa makoker asa-a taor tasareper. Süra Aor bo anko majung tashi maiter dang tashi tait tekümküm rogo ta ajabaji tai ta bilemer. Ya alima nung tantsür tambur tashi maiter anogo aser asenoki TEINTET ROGO anogo ta lanurtem nem jateta yutsüra aibelen tulu asütsü.

Anungji Teintet rogo anogo ta masü tantsür tambur tasar rogo (senior citizen anogo International Day of Older person's) anogo ta ajatsüla ta bilemba shisa lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Birmingham anasa Khristan monument tulutiba yanglu tenzükogo



'Eternal Wall of Answered Prayer' project team noksa nung angur.

November 10, 2025: UK nung Birmingham anasa Khristan monument ka yanglu tenzükogo aser iba ya UK nung Khristan monument tulutiba asütsü.

Iba project team jagi mezüngbuba shilem nung pound sen million 40 bendentetba sülen iba monument yanglu tenzüker.

'Eternal Wall of Answered Prayer' ta ajaba monument ji Birmingham anasa Colehill nung M6 aser M42 lenmang tsüngda yanglutsü.

Iba monument ji metong nung metre 51 talang asütsü aser 'Angel of the North' den anasü agi talangba asütsü. Iba monument ji lungro million 1 amshia yanglutsü aser lungru shiaji Tsüngremi sarasademba langzüba otsü kaka den sendaktepa asütsü; ibaji smartphones ajanga züngtettsü.

Sentong ayongzükertemi ashiba agi, tang tashi nung linük 125 nungi tamangertemi Tsüngremi sarasadem langzüba otsü 120,000 dak tali agütsüogo.

Iba monument yangluba sentong tenzüka Bodhbarnü sentong ka agiogo. 2028 küm tashi nungbo iba monument renemtsü aser public dang sayatsü. Iba mapang tashi nungjibo sarasadem langzüba otsü 250,000 dak tali angutsü

imlar.

Iba project atema alima tesem balala nungi nisung 20,000 dak temai tenla agütsüogo.

Iba mapatong apiteta tenzüksangji Richard Gamble lir. Pa ya taoba mapang Leicester City football club nung chaplain inyaka liasü.

Küm 20 tejaklen pai iba ya apitet aser 2015 küm nungi pai iba project atema teyari bushi tenzüka liasü.

Gamble-i, "Teimla otsü million 1 lemsateptsü aser nisungtemi Yisu meteta, Yisui sarasadem ola angar aser sarasadem langzür ta lemsateptsü atema onoki monument ka yanglu tenzüka atema pelar. Onoki tetsükdaksü aiben ajangshia liasü, aser tang iba mapang ya tetemsü mapang ka ta ni bilemer," ta metetdaksü.

"Iba project atema nisung meyrjang aikati peii akok yariogo, aser aba atemaji Eternal Wall project-i ajak dang pelar. Onoki iba jenjang tongtettsüsa senjang ka tenlaba shia, ghonda ka tenlaba shia aser sarasademtsüba atema pelar," ta pai metetdaksü.

"Iba mapang ya teimla temaitsü yanglutsü mapang, sarasadem tashi kuli asütsü mapang aser asen linük nung

Khristan senmang wazüka ayutsü mapang," ta pai ashi.

Iba project ya Snug Architects-i design asü aser parnok ya Royal Institute of British Architects tetoktepba ajanga shima liasü. Tongti contractor ji VSL lir.

Iba monument yanglutsü atema aliji IM Properties-i tenla agütsü, iba dak alia parnoki senotsü tenla-a agütsüogo.

Parnoki ashiba agi, iba monument renemba sülen küm shia nisung 250,000 dak temai iba monument semdangtsü imlar. Iba monument ya ali acre 10 nu yanglutsü aser yangji gari tanendak, tesemdangertem atema centre ka aser conference hall ka yanglutsü.

Iba project renemtsü atema ano pound sen million 5.7 tali nüngdaksü, ta parnokisa metetdaksü.

Lord Edmiston-i, "Asen linük aser tesem ajaklen nübur ajak dang Tsüngremi ajungba nenshia metetdaksütsü nükjidong nung Eternal Wall yanglur. Iba ya tang putu nung alirtem aser tarutsü nung alirtem dang anüng-alima yanglusang Tsüngremi sarasadem jenti langzüba aser tanü tashi sarasadem langzüba nenshia metetdaksütsü atema iba ya nüngshi ka asütsü," ta ashi.



Dimapur Ao Baptist Arogo ajanga 27 - 30 October 2025, Unity Ao Baptist Arogo nung tenla tulu agütsüa Father's School katsüba atema DABA dang kangasa pelar. Talisa tesayur Mr.Imtiakum (Associate Pastor), Mr. Imtimenba (Associate Pastor), Mr. Wati (Evangelist), aser Mr. Tia (Media coordinator) dang pelar. Tsüngremer wadang tulu asoshi maneni moajangma.

ANOGO ABEN TSÜNGREM DEN

Tsüngrem tamang katetba lir

Shibai nenok aja pa temulung lemtettsüsa lir aser pai aji inyaktsü. 1 Tesa. 5:24.

Tsüngrem O temulung lemteta mayu tashi aser inyaktsü asoshi tashi ita maküm tashi kecha inyaktsü Pai asenok majar. Tsüngremi ashiba inyaktsü teti tamang kateta malir, saka Pa teti tamang katetta alir aser Pa tenangzükba atalokdaksütsü asoshi Pa O nung teti noktaker (Isa. 46:11).

Kodang Israel nungeri Temerem Tzüyim atong, Tsüngremi Pa tenangzükba agienogo ta parnoki bilem. Tzüyimi parnok tejaklen noktang, aser Ejiip armyi parnok tepsettsü aria arur! Aji saka Tsüngremi Pa tamang katetba kuli asü. Pai Par chirtem jembiba O ajak nung tamang katetta aliba kuli asü.

Tsüngremi temeja mapa kar indang ne den jembir alitsü akok - ner arogo nung tenzüktsü, ner tanurtem sayutsü mesüra nai ne mapa nung kechi inyaktsüla. Nai Pa dang tashi angaa aru saka tang nai Temerüm Tzüyim atonger. Tsüngremi kechi inyaktsü nangzük aji mataloker ama nai bilemstü akok. Ne tenzüka mapa junga magizük ama mesüra ner chirtemi anema apusor mesüra mapa nung külem inyakertem ne mapa anema jembir.

Tsüngrem jakla nung amangang. Tamang katetta alitsübaji Pa yimya. Putu ajak nung Pa nübur taküm kuli T.Ken züluri sangdong: "Ni asangur temeshipur senzuka yutsüba, mesüra pa metsüi meshimetsüba ni mangu." (T.Ken 37:25).

Na tang kechi tia nung lidir liaka teyimla tesama. Tsüngremer shilem nung tamang mekatetba shingaia ajangshia mali. Kenü anogo Tsüngremi inyakba nai angutsü aser tamang katetba asoshi Pa tenüng asangtsü.

Nigerian Army tongtii Khristantem anema inyakba nokdangtsü nangzük

November 10, 2025: Nigeria teyari agütsüba anentsü aser nung Khristantem jenti Islamic kiralongrartem tepsetba dak sendakba nung tawa US Tir, Donald Trump-i Nigeria amokmerenba aser iba linük jagi US sepaitem yoktsü, ta sangdongba sülen tang Nigeria nung Army tongti tasenbai Nigeria north tsütsülen kiralongrartem anema sashia apusotsü nangzükogo.

US Tir Trump-i, Nigeria nung Khristantem amakba ya sorkari menokdangtetra US sepaitem yoktsü, ta amokmeren.

Nigeria nung army tongti tasenba, Lieutenant General Waidi Shaibu-i Maiduguri nung sepaitem dang, "Kiralongrartem maakdoktsü atema nenoki training agiogo. Tangbo nenoki khenyongi balaka inyaktsüla," ta metetdaksü.

Paisa, kiralongrartem anema raraba tongbang nung takok angutsü atema nenok nem nüngdakba teyari ajak agütsütsü aser sabang tasen agütsütsü, ta metetdaksü.

November 1, 2025 nü sepaitem ayaokogo, ta Trump-i Nigeria nem senotsü

teyari agütsüba anentsü aser Islamic kiralongrartem samatsütsü, ta sangdonga liasü. Nütsüng million 220 aliba Nigeria linük nung Khristan aser Muslim nütsüng shilemji kasasa dang lir, ajisüaka iba linük nung Boko Haram aser Fulani telok densema Islamic telok balalai Khristan yimtsüngtem kanga amaker aser Khristantem jenti tepseter.

Nigeria nung telok balalai yimsü nung ajemdaker Khristantem amaker, aluyimer Khristantem aser kiset shiruru mesür Muslim nunger tsüngda rarar aser kin tsüngda-a rarar.

Africa nung nütsüng teimba aliba linük nung ya Khristan meyrjang aika tepsetogo aser Nigeria north tsütsülenbo Muslim nungertema aika tepseter.

Army tongti, Shaibu-i, linük nung Khristantem densema nübur ajak kümzüksü asoshi kiralongrartem maakdoktsüji tongtibang; tongbang raraba tongtibang mapang kati sepaitem ayaokogo, ta metetdaksü.

AO OSHI ANGAZÜKDAK:**TANÜ ANGAZÜKTSÜBA OJANG****Tongtoret**

(n) temang nung teret tongtibangtiba, terongdongret (backbone)

* Tongtoret mejungra mapa kecha meinyaktettsü.

Tongtonglatsü

(adv) temulungjang anakshia shisaboluba (palpitation, heart thudding)

* Tangar raratepba ngur ni tongtonglatsü atu.



Tir Yimyim

OLONG PAITEP # 7326

1						2				3
								4		
5		6				7				
8										9
								10		
				11		12				
		13								
14						15				
				16						

TIPIEN

1. O jembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsüngpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjidong - 4
11. Tenük-telen mejungi aküm - 5
13. Terok nungi adokba - 3
14. Meimchir telemisa - 3

OLONG PAITEP # 7325 TELANGZÜBA**TIPIEN:**

1. Telok, 4. Aluru, 6. Ozüing, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN:

1. Tenükjang, 2. Luden, 3. Kioktsü,
5. Lenti, 7. Tajangzük,
11. teronem, 12. Sempa,
13. Jahaz.

NAI-A YA METETTER

Indian Railways ajanga alima otsü taseen ka yanglutetogo aser ibaji "longest railway platform" lir.

Guinness World Records-i Karnataka nung aliba Swamiji Hubballi Junction ya alima nung railway platform talangtiba ta agizükogo.

Iba platform indang tasazük ya 1,507 metres lir aser train talang ana külemi anenteter. Iba platform ya South Western Railway kübok yard remodelling project nung shilem ka liasü aser India nung railway junctions mazüngtiba nung maparen tip atemtsü nükjidong nung yanglushi. Hubballi ajanga Bengaluru, Mumbai, Goa, aser Hyderabad tsüngda senzüba train tem sendakteper.

Mizoram Police-i heroin shibelener ka Delhi nung apu

Aizawl, November 10, 2025

(Agencies): Mizoram nung cross-border drug trafficking anema mapa inyaka aruba nung temulung melemi bilemer tetsüdi ka puogo. Mizoram nung heroin teimtiba apuba dak sendakba nung iba nisung apu.

November 5, 2025 nü Chanakya Place, New Delhi nung Joseph Lianthangpuia (42) apu ta Mizoram Police-i

metetdaksü.

Pa ya Saitual Police Station nung benoka aliba ken o den sendaktepa lir. Taküm August ita hari ka nung heroin seret 15 apuba atema iba ken o benok aser iba ya Mizoram putiotsü nung drug teimtiba apuba lir.

August 23 nü police-i MZ-01X-1909 gari nung drugs bena aliba apu. Iba gari ya

Lalliancheua (20)-i ania liasü aser pa ya Falam, Myanmar nung Challianzula'er jabaso lir.

Iba ajanga India-Myanmar arrtsülen drug trafficking network tajung ka amenoka aliba jungkai adok.

Tan hopta tetenzüklen Aizawl nung drug shibelener tetsüdi Lalchhuanthangi (50) apuba sülen Joseph Lianthangpuia puogo.

EAC-i Guwahati nung Indian Air Force Day amung

Guwahati, November 10, 2025 (Agencies): Deobarnü Guwahati nung Eastern Air Command-i Lachit Ghat nung full-scale air show tulu ka ayonga agiogo.

93rd Indian Air Force (IAF) Day benjungmung tenüing nung Brahmaputra River madak anüinglen air show agi aser iba ya Northeast nung mezüngbuba asütsü.

Deobarnü aircraft aser helicopters 75 temai 25 formations tema sayua liasü.

Iba sentong nung Assam Chief Minister Himanta Biswa

Sarma aser Governor Lakshman Prasad Acharya nati tongti tesemdangertem ama aden. Iba sentong nung Defence Minister Rajnath Singh adentsüba liasü saka maparen kar ajanga medentet, ajisüaka Air Chief Marshal Amar Preet Singh aden.

Deobar anüinglang 12:00 nungi nikonglang 2:00 tashi Guwahati, Tezpur, Jorhat, Chabua, Hasimara, Bagdogra, aser Panagarh air bases nungi tayimtsütemi shilem agi.

Mezüngbuba nung LCA Tejas ajanga call sign "Lachit"

kübok ayim. Iba ya Assam nung legendary general Lachit Borphukan nem tetushi agüja sayu.

Iba mapang Rafale, Sukhoi-30 MKI, MiG-29, Mirage, Jaguar, Apache, IL-78 refueller, C-17 Globemaster, C-130 Hercules, Advanced Light Helicopter (ALH Mk-1), aser Antonov AN-32 tayimtsütem amshi.

Tayimtsütemisa Operation Sindoor nem tetushi agütsüba formation sayu aser Surya Kiran Aerobatic Team (SKAT)-ia shilem tajung agia liasü.

Myanmar aser Assam nung Tai chubar kibongtem ajuruteper

Guwahati, November 10, 2025 (Agencies): Society for Tai Ahom Resurgence (STAR)-i Sivasagar kübok Yuva Dol nung Tai kinungertem longjemshiba sentong ka ayonga agiogo.

Iba sentong nung Myanmar nungi Tai Royal Families züingsemtem aden. Parnok ya Ahom dynasty tenzüksang Chaolung Sukapha aser Assam nung Tai Ahom Royal

Families nungi jakzüka aoertem lir.

Iba sentong nung Arunachal Pradesh Deputy Chief Minister Chowna Mein dena tongtipang nisungtem aika aden aser parnoki Tai maitsü asentenshitsü aser wazüka ayutsü indang jembitep.

STAR Chairman Hemanta Kumar Gogoi aser par teloki Tai civilization wazüka ayutsü

atema iba sentong ayongzüka atema tenüingsang agütsü.

Tai Ahom nung ya Assam nung kin ka lir. Parnok ya Yunnan, China nungi aruba Tai nung den sendaktepa lir aser iba ya 1228 CE nung Chaolung Sukapha lenisüba kübok liasü.

Sukapha-i Brahmaputra Valley nung Ahom kingdom amenok aser iba yimli ajanga küm noklang trok shi Assam yimsü asü.

ICICI Bank

PUBLIC NOTICE

Registered Office: ICICI Bank Tower, Near Chakli Circle, Old Padra Road, Vadodara- 390007

Corporate Office: ICICI Bank Towers, Bandra-Kurla Complex Mumbai 400051

GOLD E-AUCTION CUM INVITATION NOTICE

Tsünglanglen shia aliba sen apur dang parnoki ICICI Bank Limited ("ICICI Bank") nungi gold ornaments ("Facility") mechi sen apua aliba menokdang ta metetdakwa aru. Parnoki apua aliba sen memonok nung onoki züngzüktepa aliba gold ornaments tem November 21, 2025 nü E-Auction asütüsü akumer. Iba dak jelia osang magütüsü account agientsü/ E-Auction anogo melentsü ICICI Bank dak tashi lir. Auction ya online online-<https://jewel-auction.procuretiger.com> nung anüngdang 12:30 ako nungi nikongdang 3:30 ako tsüngta alitsü. Terms and conditions tejanga atema agüja aliba website nung angutsü. Sen apur sür alinungbo, senmanger asoshi conditions ajak kasa alitsü.

Loan A/C No.	Customer Name
Branch Name: Dimapur	
047662001071	Ashok Kantipal
047662001338	Nurul Hoque Choudhury
Branch Name: Sarupathar	
496962000047	Rajib Sahu

Date : 11.11.2025

Place : Dimapur

S/d Authorised Officer
For ICICI Bank Limited

NPA-i IPA Nationals atema state team sangdongogo



Vice President Nisuka Khulu, General Secretary Kakivi Chishi, aser President Nathan Zeliang nung den state nungi asayartem tangokba noksa nung angur.

Dimapur, Yimpoksüi/ November 10 (TYO): Nagaland Pickleball Association (NPA)-i IPA Nationals 2025 nung asayatsü atema tang mezüngbuba State Pickleball Team sangdongogo. Iba asayamung ya November 13 nungi 16 tashi Sports School, Bengaluru nung asayatsü.

Iba ya NPA asoshi alizüing tasen ka tongtetba asütsü, kechiyong Nagaland aser state nungi asayartem national level asayamung ka nung asayatsü lir. Iba asayamung ya Ministry of Youth Affairs & Sports, Government of India, aser

Sports Authority of India (SAI)-i agizüker aliba Indian Pickleball Association (IPA) tawabangba kübok ayongzüka asayatsü renema lir.

Nagaland team atema shimba asayartem:

Men's 30+ Category:

- o Khriemetuo Pienyu - Singles
- o David Murry & Tonoto Ayemi - Doubles

Men's Open Category:

- o Zhaputso Khate - Singles
 - o Nzamo Kikon & Imsuren Longchar - Doubles
 - o Menuovi Kire - Substitute
- Team ya Captain Nzamo Kikon-i anir asayatsü aser

Nathan Kaurinta Zeliang team manager asütsü.

Asayartem shimba indang jembiba mapang Nagaland Pickleball Association Tir Nathan Zeliang-i, asayartem nem tenüngsang agütsü aser team yagi national jenjangnung linük nung asayar tajungtibatem den Nagaland tenüng nungi kanga junga toktepa asayatsü temulung lema bilemba lemsatep. Iba jenjang agitetba ya state nungi asayartem tejangraba aser Nagaland nung pickleball asaya kanga kara renloka aoba temaitsü lir, ta Tirisa shisem.

Dr. T. Ao Junior Girls National Football Champ's atema senden amen

Dimapur, Yimpoksüi/ November 10 (TYO): Taruba Dr. T. Ao Junior Girls National Football Championship 2025-26 atema sensaksemtü asoshi Department of Youth Resources and Sports (YRS)-i ayongzüka November 10 nü DC Conference Hall, Chümoukedima nung senden ka menogo.

Iba senden ya Director, Youth Resources and Sports Department, Kethosituo Sekhose lenisüba nung amen, koba iba national level asayamung atema renemshia aruba lepa reprangshitsü aser sentongtem tembang renemtsü nükjidong nung ayongzüka menogo.

Organizing Committee aser Functional Area Committee tem nungi convenor aser co-convenor temi iba senden nung shilem agi, kong tanendak, security, reception aser technical ken o balala sensaksema liasü.

Senden nung Deputy Commissioner, Chümoukedima, Polan John-i, Chümoukedima nung national level asayamung

ka ayongzüka asayatsüji District administration atema maongka aser tayongzüka ka lir ta shia züingsem ajak dang iba asayamung takok ngua ayongzüka asayatsü asoshi kanga junga sendaktepa inyaksangshitsü ayongzüka liasü.

District administration tenüng nung Nodal officer asütsü atema SDO(C), Chümoukedima, Chumbenthung Murry shima liasü.

Dr. T. Ao Junior Girls National Football Championship ya Nagaland-i ayongzüka asayaba national asayamung tongtibang ka lir. Iba asayamung ya chümoukedima Football Stadium nung November 18 nungi December 11 tashi asayatsü. Taküm iba asayamung nung team 16-i shilem agitsü.

Hombarnü senden nung Youth Resources & Sports Department, Nagaland Football Association, District Administration, DPRO Dimapur nungi ketdangsürtem aser ken o dak sendaka aliba tanga ketdangsürtemi shilem agia liasü.

Ryan Williams India tebur football team nung züngoksemogo



Cup qualifier masaya tsüingda asayar ana ya camp atema jaoka liasü.

AIFF-i tongtibang telemtetba ka agia India nungi jakzüka asayartem shirnoki India tenüng nungi asayatsü atema bendanger lisopur jenjang toktsütsü mulunger parnok team nung züngoksemogo.

Iba camp ya Brehostibarnü Bengaluru nung tenzükogo.

Williams' nem India senso jenjang agütsüba sentong ya Bengaluru FC indang training facility nung nüngtugu asayar Sunil Chhetri-i achaayanga agia liasü.

Williams' tetsü ya Mumbai nung aso aser tebu ya Kent, England nungi aso.

Tang agi tanabenbuba-ang Overseas Citizen of India (OCI) ka India football team nungi asayatsü temsüa kümogo.

Pa Australia indang U-20 aser U-23 team tem nungi asayaogo aser 2019 kübok South Korea den asayaba mapang senior team nungia second-half substitute ama asayaogo.

Pa England nung Fulham aser Portsmouth nungi asayaba sülen 2023 küm ISL club Bengaluru FC nung dena liasü.

Williams masüidang Japan nung asosang Izumi Arata-i 2012 küm India senso agia 2013 aser 2014 küm tsüingda India tenüng nungi tekuben asayaogo.

BENDANGLI OSANG :

Tapak 7 nungi...

Israel-i Lebanon army nem Hezbollah anema...

Iba jenjang agiba ya, Hezbollah pur disarm sütsütsü atema inyakyim tesashiba benoka minyakra Israel-i ano military campaign tenzükshtsü ta tekümdangtsü metetdaksüba ama reprangteter, ta Lebanon nung ketdangsürtemisa ashi.

"Parnoki onok dang ki shiai tua bushitsü akhanger, saka onoki ajibo minyaksü.. Parnoki mulungba ama onoki minyaksü," ta ketdangsür rongnung kati ashi.

Israel-i amakba aser US o Israel nati parnok nem teyari agütsür Iran amakba ajanga Hezbollah pur kanga tashi meiti kümogo, saka Lebanon nung parnok ya Shi'ites temi maneni pusemdar aser tashi ita lir.

Ken o dak sendakba nung Lebanon army-i kecha telangzüba magütsü, kechiyong parnok media policy khenyongi balaka lir.

Kasa mapang nung Israel Ato Kilonser Benjamin Netanyahu indang office-ia kecha telangzüba magütsü, saka November 2 nü Netanyahu-i, "Hezbollah pur disarm sütsütsü atema Lebanon sorkari nangzüktepba

ama inyaksü onoki imlar, aser ceasefire nung nangzüktepba ama onokia self-defence atema onok temeden aliba amshitsü. Onoki Lebanon ya onok anema amshiba tesem ka mekümdaktsütsü aser onoki nüngdakba ama jenjang agitsü," ta ashi.

Kitem meita aoba ya Israel nung tashi angaba ama south len alirtem angatetsü ta Lebanon army-i tsüba bilemer. South Lebanon ya 2000 küm tashi Israel-i küm 20 shi atsünger liasü aser taoba küm maneni parnok iba tesem makogo, ta ketdangsürtem ashi.

Maneni, Israel-i goalposts ya belenshia teti atema mangatetep adokdaksütsü aser rongsenketzüng aser yimden yimsüsüba tsütsü linük jenjang mejungi aliba yanglushitsü merangba raksatsütsü ta Beirut-i bilemer, ta security ketdangsürtem aser yimden yimsüsür kati ashi.

Ajisüaka Israel nung ketdangsürtemi ashiba agi, Hezbollah puri south aser north len nija kitem nung amendaker asüngsashitsü merangdar, koba Lebanon army-i mazüokteter. Israel-i, Mechanism nem

Hezbollah pur indang depot tem asütsü ta temulung melemi bilemba tesemtem indang itangiter osang agütsür, koba Mechanism-i Lebanese army nem agütsür. Israel-i Hezbollah pur prangbong injang belentepa aliba mapang aser Lebanon army-i ilunga jenjang magiba mapang indang indanga jenjang agia rudar, ta Israel nung military ketdangsür kati ashi.

Lebanon nung ketdangsürtemi ashiba agi, linük south len army checkpoint tasen amenokogo aser iba ajanga Hezbollah pur prangbong hadirtem belenshiba nokdangdar.

Kasa mapang nung Hezbollah puri south len parnok asüngsashitsü meranger ta ashiba magizük.

Parnoki Lebanon army nem kecha tenokdangba magütsü aser taoba küm ceasefire benokba sülen Israel dak khen danga injang khalokja mali.

Ajisüaka parnok prangbong hadirtem ajunga toktsütsü memulunger aser iba hopta sangdonga ka ajanga, Israel nung ket nungi Lebanon kümzüka ayutsü atema parnok temeden lir ta shiogo.

BILEMDANGANG

"Limaliro aser achi ajem mazüoktetertem anema alitsü tasak."